

ጳውሎሲ ቆርንቶሳ አሳሰ ፃፊዳ ናሞዓንሶ ኪታ ጋሳ ቆፋ

ጳውሎሲ ቆርንቶሳ አሳሰ ፃፊዳ ናሞዓንሶ ኪታይ ፃፊቲዳይ፣ ኢያው ቆርንቶሳ ዋሳ ከላራ ዳዒያ ጋሄቴላይ ዳሮ ሜቶ ጊዶ ጌሊዲ ዳዒያ ዋዳና። ኢሲ ኢሲ ዋሳ ከላ አሳቲ ጳውሎሳ ኢታ ቦሬ ቦሪኮካ ጳውሎሲ ሲጋ ሜዳናው ኢያው አሞይ ዳዒይሳ ቤሲሰ። ሄሲ ሃኒያ ዋዳ ጌታ ኡፋይሳ ኡፋይታናው ዳንዳዒይሳ ቆንጨሴሰ።

ጳውሎሲ ባ ኪታን ኮይሮ ከፊሊያን፣ ቆርንቶሳ ዋሳ ከላራ ኢያው ዳዒያ ጋሄቴላ ቆንጨሲዲ፣ ዋሳ ከላን ሜዴቲዳ ቦሪያሲኔ ኢጭዋሰ አይሰ ሚኖ ዛሮ ኢሚዳኮ ኦዳሰ። ሄሳራ ጋሊዲ ኢያ ሴራይ ኤንታ ናጋራፔ ዛሪዲ ሲጋን ጋሊዳ ጊሾ ኢ ኡፋይቲዳ ኡፋይሳ ኤንታው ቆንጨሴሰ። ካሊዲካ፣ ዪሁዳን ዳዒያ አማኒያ አሳ ማዳናው ባንታው ዳዒያባፔ ጮ አማና ሜላ ሃሳይሴሰ። ወርሴላ ሽምፖታን ጳውሎሲ ባ ሃዋሬቴላ ቦላ ዳንዲዳ ሞቴዋሰ ዛሮ ኢሜሰ። ጋሶይካ፣ ቆርንቶሳ ዋሳ ከላን ዳዒያ ኢሲ ኢሲ አሳቲ ባንታና፣ «ቴማ ሃዋሬ» ኦሊዲ፣ «ጳውሎሳ ዋርዳንቸ ሃዋሬ» ኦሊዲ ሞቶሶና።

2 ቆርንቶሳ ኪታ ኣይፌ ቆፋታ

ጌሎ ቆፋ 1:1-11

ጳውሎሳኔ ቆርንቶሳ ዋሳ ከላ 1:12-7:16

ዪሁዳን ዳዒያ አማኒያ አሳ ማዳ 8:1-9:15

ጳውሎሲ ባ ሃዋሬቴላ ማታሰ ኢሚዳ ዛሮ 10:1-13:10

ኩሻ ቆፋ 13:11-14

1 ያሳ ሽኔን ዬሱስ ኪሪሰቶሳ ሃዋሬ ጊዲዳ ጳውሎሲኔ፣ ኑ አሻ ፂሞቲዮሲ፣

ቆርንቶሳን ዳዒያ ያሳ ዋሳ ከላሲኔ ኣካያ ቢታን ዳዒያ ያሳ አሳ ኡባሰ ፃፊዳ ኪታ።

2 ያሳ ኑ አዋፔኔ ጎዳ ዬሱስ ኪሪሰቶሳፔ፣ ኣጼ ከሃቴላይኔ ሳርቴላይ ሂንቴው ጊዶ።

ጳውሎሲ ያሳ ጋላቴሰ

3 ማርቴላ አዋስ፡ ኡባ ዋዴ ኮና ሚንጼሌያ ያሳሰ፡ ኑ ጎዳ ዬሱሱ ኪሪሰቶሳ አዋስ ጋላቲ ገደ።

4 ያሳይ ኩሰ ኢሚዳ ሚንጼሌ-ዋን፡ ሜቶን ዴዔይሳታ ኑ ሚንጼላና ማላ ያሳይ ኮና ኑ ሜቶ ኡባን ሚንጼሌሰ።

5 ኑኒ ኪሪሰቶሳ ዳሮ ዋያ ሻኬቲዳይሳዳ ቃሲ ኑኒ ኢያ ዳሮ ሚንጼሌ-ዋን ሚናና።

6 ኑኒ ዋዬቲኮ ሄሲ ሂንቴና ሚንጼላናሳኔ ሂንቴና አሻናሳ። ቃሲ ኑኒ ሚኔቲኮ ኑኒ ጌንጨዳ ዋያ ማላ ሂንቴካ ጌንጨዳ፡ ያሳይ ሂንቴው ኢሚያ ሚንጼሌ-ዋን ሚናና።

7 ሂንቴ ኑ ኤኪዳ ሜቱዋ ማላ ኤኪዳ፡ ኑ ሚንጼሌ-ዋን ሻኬታናይሳ ኑ ኤሪያ ገሾ ኑ ኡፋይሳይ ሂንቴናን ሚና።

8 ኑ ኢሻቶ፡ ኢሲያ ቢታን ኮና ጋኪዳ ሜቱዋ ሂንቴ ኤራና ማላ ኮዮሰ። ሄ ኮና ጋኪዳ ሜቶይ ኑ ዋልቃፌ ዳሪን፡ ሃይቆና አቶኮ ገዲ ኡፋይሲ ቃንጻዳሽን።

9 ኑኒ ኑ ቦላ ሃይቆ ፐርዲ ፐርዴቲዳ ማላ ቆፒዳ። ሸን ኑኒ ኑ ሁዒን ገደናሽን፡ ሃይቁዳይሳታ ዴንጼያ ያሳን አማኔታና ማላ ሄሲ ሃኒሰ።

10 ያሳይ ሄሳ ማላ ኢታ ሃይቆፔ ኮና አሺሰ፤ ሃዒካ አሻና፤ ሲንጻፌካ ኢ ኮና አሻና ገዲ ኢያን ኡፋይሲ ዋሰሰ።

11 ዋሳን ኮና ማዲቲ። ዳሮ ዋሳ ጋሶን ያሳ ማዲዋ ኑ ዴሚያ ዋዴ ዳሮ አሳይ ኑ ገሾ ያሳ ጋላቶሶና።

ጳውሎሲ ባናው ቆፒዳ ቆፋ ላሚሰ

12 ኑኒ ኑ ጌሻ ካሃን ጨቁቶሰ። ኑኒ ሃ አላሚያን ዴዒዳ ዴዑዋን ኡባራካ ኑ ዴዒዳ ዴዑዋን ቱማቴላኒኔ ሱሬቴላን ሂንቴራ ዴዒዳ። ሄሲካ፡ ሃ አላሚያ ጨንጫቴላን ገደናሽን ያሳ አቆ ኬሃቴላና።

13 ኑ ሂንቴው ፃፊዳ ዳብዳቤይ ሂንቴ ናባባናውኔ አኬካናው ዳንዳዒያባፔ አቲን ሃራ ገደና። ሂንቴ ኢያ አኬካናው ዳንዳዒይሳ ታ አማናይሰ።

14 ሃዒ ሂንቴ ኮና ሃኒዳ ኬና ኤሬታ፡ ሸን ሲንጻፌ ኩሚሊ ኤራናይሳ ታ አማኔታይሰ። ኑ ጎዳ ዬሱሱ ሲሚያ ዋዴ ኑኒ ሂንቴናን ጨቁቲዳይሳዳ ሂንቴካ ኮናን ጨቁታና።

15 ሄሳ ታኒ ሎይላ ኤሪዳ ገሾ ሂንቴ ናምዓንሎ ጎዔታና ማላ ካሴታዳ ሂንቴኮ ባናው ቆፋ ቃቻሰ።

16 ታኒ ማቁደኒያ ባሽኔ ያፔ ሲማሽ ሂንቴና ቤዓና። ታኒ ያፔ ዪሁዳ ቢያ ዋዴ ሂንቴ ታና ታ ኑጊያን ማዳና ጋዳ ቆፓሰ።

17 ታኒ ሄሳ ጋሼ ኣይ ኦፋናው ቤሲያኮ ኤርና ኣሲ ዳናይና? ዋይኮ ታኒ ታ ቆፋ ቃቺያ ዋዴ ኣሳ ቆፋዳ፣ ኢሲ ቶሆ «ኤ» ቃሲ ኢሲ ቶሆ «ኣካይ» ጊያ ኣሳ ሜሌዬ?

18 ሺን ያሳይ ኣማኔቴይሳ ጊዲያ ጊሾ ኑ ሂንቴው ኦዲያ ቃላይ «ኤ» ዋይኮ «ኣካይ» ጌይሳ ጊዴና።

19 ታኒ፣ ሲላሴይኔ ዓሞቲዮሲ ሂንቴው ማርካቲዳ ያሳ ናዓይ፣ ዬሱሰ ኪሪሰቶሲ ኡባ ዋዴ «ኤፕ» ኣቲን «ኤ» ኔ «ኣካይ» ጊዴና።

20 ያሳይ ኢማና ጊዳ ኡባይ ኪሪሰቶሳ ባጋራ «ኤ» ጊዴሰ። ኑኒ ኪሪሰቶሳ ባጋራ ያሳ ቦንቾሰ፣ «ኣሚንዒ» ጌይ ሄሳ ጊሾሳ።

21 ኑኔ ሂንቴ ኪሪሰቶሳን ሚኒዲ ኤቃና ሜላ ኦሌዳይኔ ባ ኦሱዋሰ ዶሪዳይ ያሳ።

22 ኑኒ ኢያባ ጊዴይሳ ኤሪሳናው ባ ማታሚያ ኑ ቦላ ዋሊሰ፤ ቃሲ ባ ጌሻ ኣያና ኦይሊ ኦሊዲ ኑ ዋዛናን ዋሊሰ።

23 ታኒ ቆርንቶሳ ቦና ኣጊዳይ ሂንቴ ኣዛናና ኣታና ሜላሳ፤ ሄሲ ዋርዶ ጊዲኮ ያሳይ ታ ሸምቸዋ ታፔ ኤኮ።

24 ሂንቴ፣ ሂንቴ ኣማኑዋን ሚኒዲ ዳዒያ ጊሾ ኑ ሂንቴና ኡፋይሳናው ሂንቴራ ኢሲፌ ኦሌይሳታፔ ኣቲን ሂንቴና ዋልቃን ኣማንሌይሳታ ጊዶኮ።

2

1 ታኒ ናምዓንላ ሂንቴኮ ቢኬ ጋዳ ቆፋ ቃቺዳይ ሂንቴና ኣዛንላና ኣጋናሳ።

2 ታኒ ሂንቴና ኣዛንሊኮካ ታ ኣዛንሊዳ ሂንቴፌ ሃሪ ታና ኡፋይሳናው ዳዔይ ኦኔ?

3 ታኒ ሂንቴው ሄ ዳብዳቢያ ፃፊዳይ፣ ታ ሂንቴና ቤዓናው ቢያ ዋዴ ታና ኡፋይሳናው ቤሲያ ኣሳን ታ ኣዛናናው ኮዮና ጊሾሳ። ታ ኡፋይቲያ ዋዴ ሂንቴ ኡባይካ ኡፋይታናይሳ ታ ኣማናይሰ።

4 ታኒ ዳር ዋዬኒኔ ኡንዓን ቃሲ ዳር ኣፋሳን ፃፊዳይ፣ ሂንቴና ኣዛንላናሳ ጊዶናሺን ታኒ ሂንቴና ኡባ ኣይ ሜላ ዶሲያኮ ሂንቴና ኤሪሳና ሜላሳ።

ቆሃዳይሳ ማርባ

5 ኣሴ ኣዛንሊዳ ኦኒካ ዳዒኮ ታ ኢያ ባላ ዳርሳናው ኮዩኤፌ ኣቲን ታና ጊዶናሺን ሂንቴፌ ዳርታ ኣዛንሊሰ።

6 ሂንቴፌ ዳሪያ ኣሳይ ሄ ኡራ ሴሪዳ ሴሪይ ኢያው ጊዳና።

7 ሄሳ ጊሾ፣ ሄ ኡራይ ዳር አዛኒዲ፣ ኡፋይሲ ቃንዖና ማላ ሂንቴ ኢያ ማራናውኔ ሚንጮላናው ቤሴሰ።

8 ሂንቴ ኢያ ሲቄይሳ ዛሪ ኢያው ቆንጨሳና ማላ ታ ሂንቴና ዋሳይሰ።

9 ታ ሄ ዳብዳቢያ ሂንቴው ፃፊዳይ፣ ሂንቴ ፓጩቲዲ፣ ኡባባን ታው ከቴቴይሳ ኤራናው ኮዪዳ ጊሾሳ።

10 ሂንቴ ማሪያ ኡራ ታካ ማራና። ታኒ ማራናባይ አይቢ ዴዲኮካ፣ ኪሪሰቶሳ ሲንላን ሂንቴ ጊሾ ጋዳ ማራሰ።

11 ታኒ ሄሳ ኦሊዳይ ፃላሂያ ጨዋ ኦሱዋ ኑ ኤሪያ ጊሾ ፃላሄን ጨማቶና አታና ማላሳ።

ዲርዳዳን ጳውሎሳ አንዴቴላ

12 ታኒ ኪሪሰቶሳ ዋንጌላ ሳባካናው ዲርዳዳ ቢዳ ዋዴ ጎዳይ ያን ታው ኦሶ ኦጌ ጊሊሲዲ ዋሊሰ።

13 ሺን ታኒ ታ አሻ ቲቶ ያን ደማቦና ጊሾ ታ ዋዛናይ ሸምፒቤና። ሄሳ ጊሾ፣ ያን ዴዲያ አሳ ሳርላዳ ኢያ ኮያናው ማቁደኒያ ባሰ።

14 ሺን ኪሪሰቶሳ ባጋራ ኡባ ዋዴ ኑና ያሮን ካሌሊያኔ ሺቶ ማላ ሳዊያ ኪሪሰቶሳባ ኑ ኤሪያ ቲሚርቲያ ኡባ ቤሲ ጋላና ማላ ኦሊያ ያሳ ጋላቲ ጋኮ።

15 ኑኒ አቲያ አሳ ጊደኒኔ ዳያ አሳ ጊደን ኪሪሰቶሳ ባጋራ ያሳሰ አሜቲዳ ሳዊያ ሺቶ ማላ።

16 ዳያ አሳሰ ሃይቆኮ ኤፊያ ሃይቆ ፔና፤ ቃሲ አቲያ አሳሰ ዴዖኮ ኤፊያ ዴዖ ሳዋ፤ ያቲን፣ ሄሳ ማላ ኦሱዋሰ ጊዳናይ ኦኔ?

17 ኑኒ ያሳ ቃላ ዋዴ ደማናው ኮዪዲ ዋላኪዲ ዛልዲያ ዳር አሳ ማላ ጊደኮ። ሺን ያሳይ ከቲዳ ሱሬ አሳታ ማላ ኪሪሰቶሳን ዴዲዲ ያሳ ሲንላን ቃላ ኦደሰ።

3

ኦራላ ጨቁዋ አሳንቸታ

1 ኑኒ ዛሪዲ ኑና ሳቢኖዬ? ዋይኮ ሃራ አሳዳ፣ ሳባ ዳብዳቢያ ሂንቴው ዬዳናው ዋይኮ ሂንቴፌ ኤካናው ኑና ኮሺዬ?

2 አሲ ኡባይ ሂንቴና ኤራና ማላኔ ናባባና ማላ ሂንቴ ኑ ዋዛናን ፃፊቲዲ ዴዲያ ኑ ዳብዳቤ።

3 ሂንቲ ቃላሜን ጊደናሺን ዴያ ያሳ ኣያናን፣ ሹቻ ቦላ ጊደናሺን ኣሳ ዋዛናን ፃፊቲዳይሳታኔ ኑናን ሃጋዜቲዳ ኪሪሰቶሳ ዳብዳቤ ጊዳይሳ ቤሲዳታ።

4 ኑ ሄሳ ጊዳይ፣ ኪሪሰቶሳ ባጋራ ያሳን ኣማናይ ኑስ ዴዒያ ጊሾሳ።

5 ኑ ሄሳ ኦላናው ዳንዳዒዳይ ያሳ ዋልቃናፔ ኣቲን ኑኒ ኑ ዋልቃን ኣይኮካ ኦላናው ዳንዳይኮ።

6 ኑ ኦራላ ጫቁዋ ኦሳንቸታ ጊደና ሜላ ያሳይ ኑና ዳንዳዒሲሰ። ሄ ኦራላ ጫቆይ ጌሻ ኣያናን ቤንቲዳይሳፊ ኣቲን ፃፊቲዳ ሂጌን ጊዳና። ሂጌይ ዋዴሰ፣ ሺን ጌሻ ኣያናይ ዴያ ኢሜሰ።

7 ሹቻ ቦላ ፃፊቲዳ ሂጌይ ኢሜቲያ ዋዴ ያሳ ቦንቸይ ቆንጨሰ። ሙሴ ሶምዑዋን ዴዒያ ቦንቸይ ጳዩሹ ቢያባ ጊዲኮካ፣ ኢሰራዔሌ ኣሳይ ኢያ ሶምዑዋ ቲሺ ኦሊዲ ጃላናው ዳንዳዒቦኮና። ሂዛ፣ ሃይቆ ኤሂያ ሂጌይ ሄሳ ሜላ ቦንቸን ቆንጨኮ፣

8 ያቲን፣ ጌሻ ኣያናን ኦሴቲያ ኦሱዋ ቦንቸይ ዋኒዲ ኣዴኔ?

9 ኣሳ ቦላ ፐርዳ ኤሂያ ሂጌይ ቦንቸ ጊዲኮ ያቲን፣ ኣሴ ጂሊሲያ ኦራላ ኦጌይ ዋኒዲ ኣዴዲ ቦንቸቲኔ?

10 ካሴ ቦንቸ ጊዲዳይሳ ሃዒ ኣዴያ ቦንቸይ ዴዒይሳራ ጋሊ ቤዒያ ዋዴ ቦንቸይ ባይናባ ጊዲሰ።

11 ጉላ ዋዴሰ ቆንጨዲ ጉዬፔ ጳይዳይሲ ሃይሳዳ ቦንቸቲኮ፣ ሜሪናው ዴዒይሲ ዋኒዲ ኣዴዲ ቦንቸቲኔ?

12 ኑስ ሃይሳ ሜላ ኡፋይሳይ ዴዒያ ጊሾ ዩላቶና ኦዴቶሰ።

13 ኑኒ፣ ኢሰራዔሌ ኣሳይ ጳዩሹ ቢያ ቦንቸዋ ወርሴላ ቤያና ሜላ ባ ሶምዑዋ ካሚዳ ሙሴ ሜላ ጊደኮ።

14 ሺን ኤንታ ዋዛናይ ደጨሰ። ሃቺ ጋካናው ኤንቲ ጋልዓ ጫቁዋ ናባቢያ ዋዴ ኤንታ ዋዛናይ ሄ ካማን ካሚቲ ዴዒሰ። ሄ ካማይ ኪሪሰቶሳ ፃላላን ቃሬቲሰ።

15 ሺን ሃቺ ጋካናዉካ ኤንቲ ሙሴ ማፃፋ ናባቢያ ዋዴ ኡባን ሄ ካማይ ኤንታ ዋዛና ካሜሰ።

16 ሺን ኦኒካ ጎዳኮ ሲሚያ ዋዴ ኣዉዴካ ሄ ካማይ ቃሬቲሰ።

17 ጎዳይ ኣያና፤ ጎዳ ኣያናይ ዴዒያ ቤሳን ላዓቲሊ ዴዒሰ።

3:3 ኬሳ 24:12፤ ኤር 31:33፤ ሃዝ 11:19፤ 36:26 3:6 ኤር 31:31 3:7 ኬሳ 34:29 3:13 ኬሳ 34:33 3:16 ኬሳ 34:34

18 ኑኒ ኡባይ ካሜቲቦና ሶምዖን ጎዳ ቦንቹዋ ቤዓና። * ኑኒ ኢያና ጊዲዳ ጎዳ ማላ ዳናናው ቦንቸፊ ቦንቸን ላሜታና።

4

ቱማ ሃዋሪቲላ ኦሱዋ

1 ሂዛ፣ ያሳይ ባ ማሮቲላን ሃ ኦሱዋ ኑስ ኢሚዳ ጊሾ ኑኒ ኡፋይሲ ቃንዖኑ።

2 ኑኒ ዬላያ ጌማ ኦሶ ኡባ ኣጊዳ፤ ጌኔ ኦሶ ኦሶኮ፤ ያሳ ቃላ ዋርዶራ ዋላኮኮ። ቱማ ቆንጨኑን ሃሳዪሼ፣ ኣሳ ኡባ ካሃይ ኑና ኤካና ሜላ ያሳ ሲንላን ኑና ሺሾስ።

3 ኑ ኦዲያ ዋንጌላይ ጌሚዳባ ጊዲኮካ፣ ጌሚዳይ ቆዮ ኦጌን ዴዲያ ኣሳሳ።

4 ሃ ኣላሚያ ሃሪያ ያሳይ ኣማኖና ኣሳ ዋዛና ጎዚስ። ኤንቲ ያሳ ማላን ቆንጨዳ ኪሪስቶሳ ቦንቸ ዋንጌላ ፖዑዋ ቤዖና ሜላ ዲጊስ።

5 ኑኒ፣ ዬሱስ ኪሪስቶሲ ጎዳ ጊዴይሳኔ ኑ ኢያ ጊሾ ሂንቲ ኦሳንቸ ጊዴይሳ ኦዶሲፔ ኣቲን ኑባ ኦዶኮ።

6 «ቆማን ፖይ ፖይ» ጊዳ ያሳይ፣ ኪሪስቶሳ ሶምዑዋን ፖዲያ ያሳ ቦንቹዋ ኤራ ፖዑዋ ኢማናው ባ ፖዑዋ ኑ ዋዛናን ፖዲሲስ።

7 ሺን ኡባፊ ኣቂያ ዋልቃይ ኑባ ጊዶናሺን ያሳባ ጊዴይሳ ቤሳናው ሃ ቦንቸ ሻሎይ ሜቃ ሚሼ * ጊዲዳ ኑ ኣሳቲላን ዴዴስ።

8 ኑ ኡባ ባጋራካ ዋዬቲዳ፣ ሺን ሜቄሪቲቦኮ። ኑስ ሃዲርሲ ጊዲስ፣ ሺን ኡፋይሲ ቃንዖኮኮ።

9 ኑ፣ ሞርኬታን ጎዴቲዳ፣ ሺን ላጌ ቆዩቦኮ። ኑ ሞርኬታን ሾጩቲዲ ኩንዲዳ፣ ሺን ቆዩቦኮ።

10 ዬሱሳ ዴይይ ኑ ኣሳቲላን ቆንጨና ሜላ ኢያ ሃይቁዋ ኡባ ዋዴ ኑ ኣሳቲላን ቶኪዲ ዩዮስ።

11 ዬሱሳ ዴይይ ሃይቁያ ኑ ኣሳቲላን ቆንጨና ሜላ ፓፃ ዴዲያ ኑኒ ኢያ ጊሾ ኡባ ዋዴ ሃይቆስ ኣቂዲ ኢሜቶስ።

12 ሂዛ፣ ሃይቆይ ኑናን ኦሲያ ዋዴ ዴይይ ሂንቲናን ኦሴስ።

* 3:18 ቤዓና፣ ማስቶቲዳ ዛሪዲ ጳላሳና ጌቲቲ ቢርሽታናው ዳንዳዴስ። 4:6 ሜዴ 1:3 * 4:7 ሜቃ ሚሼ፣ ሃ ቤሳን ሜቃ ሚሼ ጌቲቲዳይ ቢታፊ ኦሴቲዳ ሚሼታ ቤሳናሳ - ኦቶ፣ ሻቲ፣ ቤሼ...

13 ጌሻ ማፃፋን፡ «ታ አማናስ፤ ሄሳ ጊሾ ሃሳያስ» ያጌቲስ። ሄሳ ማላ አማኖይ ኩስ ደዒያ ጊሾ ሃሳዮስ።

14 ጎዳ ዩሱሳ ሃይቆፕ ዴንጢዳ ያሳይ፡ ኑናካ ዩሱሳራ ሃይቆፕ ዴንጎናይሳኔ ሂንቴራ ኢሲፌ ባ ሲንጮ ሺሻናይሳ ኤሮስ።

15 ሄሲ ኡባይ ሃኒዳይ ሂንቴ ጊሾሳ። ያሳ አጽ ኬሃቴላይ ዳሮ አሳ ጋኪያ ዎይ አሳይ ያሳ ቦንቹዋስ ዳሮ ጋላታ አማና።

አማኖን ዴያ

16 ሄሳ ጊሾ፡ ኑኒ ኡፋይሲ ቃንዖኩ። ኑ ቤንቲያ አሳቴላይ ዳቦሪሽ ቢያባ ጊዲኮካ፡ ኑ አያና አሳቴላይ ጋላስ ጋላስ ኑራዴስ።

17 ሃራስ ኑኒ ዋዬቲያ ሃ ካዉሻ ዋዬይ፡ ኡባፌ ኬሂ ጌታቲያ ማሪሪና ቦንቹዋ ኑስ አሚሳና።

18 ኑኒ ቤንቲያባ ጊዳናሺን ቤንቶናባ ያሎስ። ቤንቲያባይ ሃራሳ፡ ሺን ቤንቶናባይ ማሪሪናሳ።

5

1 ሃራ ኑ ዴዒያ ዲንካኔ ዳኒያ ሃ ሳዓ አሳቴላይ ሳሌቲኮካ፡ አሲ ከዲቦና፡ ያሳይ ኬዲዳ ማሪሪና ኬላይ ኑስ ሳሎን ዴዒይሳ ኤሮስ።

2 ሳሎ አሳቴላ ማዓናው አሞቲሽ ሃራ ሃ ሳዓን ዴዒሽ ኦሎስ።

3 ኑኒ ሄሳ ማዒያ ዎይ ካሎቶኩ።

4 ዲንካኔ ዳኒያ ሃ ሳዓ አሳቴላን ኑ ዴዒሽ ዴዳቲዲ ኦሎስ። ሃይቂያ ኑ አሳቴላይ ዴያን ሳማታና ማላ ሳሎ አሳቴላ ማዓናው ኮዮሲፔ አቲን አሹዋፔ ሻኬታናው ኮዩዲ ጊዴና።

5 ኑና ሃይሳስ ጊጊሲዳይ ያሳ። ቃሲ ሲንጎፌ ያናባስ ኦይጢ አሉዲ ባ አያና ኑስ አሚሳ።

6 ሄሳ ጊሾ፡ ኑኒ ሃ ሳዓ አሳቴላን ዴዒያ ዎይ ኡባን ጎዳፔ ሃኪዲ ዴዒይሳ ኤሪኮካ ኡባ ዎይ አማኔቲዲ ዴያስ።

7 ኑኒ ዴዒይ አማናናፔ አቲን ቤዒያባን ጊዴና።

8 ኑ ሃ ሳዓ አሳቴላፌ ሻኬቲዲ፡ ኑ ሶ ቢዲ ጎዳራ ኢሲፌ ዳናው አሞቲያ ጊሾ አማኔቲዲ ዴያስ።

9 ሄሳ ጊሾ፡ ኑ ሃ አሳቴላን ዴዒን ዎይኮ ሃ አሳቴላፌ ሻኬቲን፡ ኑ አሞይ ኢያ ኡፋይሳናይሳ።

10 ኑኒ ኢሶይ ኢሶይ ሃ ሳዓን ዴዒሽ ሎያ ጊዲን ዎይኮ ኢታ ጊዲን፡ ኦሉዳ ኦሱዋስ ቤሲያ ፒርዳ ኤካናው ኪሪስቶሳ ፒርዳ አራታ ሲንጎን ሺቃና።

እሴ ያሳራ ሲጌል

11 ሂዛ፡ ኑኒ ጎዳ ቦንቹይሲ አይ ጉሴኮ ኤሪያ ጊሾ አሳይ ኑ ኦዴይሳ ኤካና ማላ ዘርሰ። ያሳይ፡ ኑኒ ኦኔኮ ኑና ኤሬሰ፤ ቃሲ ሂንቲካ ሂንቲ ካሃን ኑ ኦኔኮ ኤሬታ ያጋዳ ቆፓይሰ።

12 ዋዛናን ጊደናሺን ማላን ጩቄቲያ አሳ ዶና ኦይፋናው ሂንቲ ኑናን ጩቄታና ማላ ሂንቲው ጋሶ ጊደናው ኮዮሲፔ አቲን ኑ ኑና ዛሪዲ ናሻናው ኮዮኮ።

13 ኑ ጎሺ ጊዲኮ ያሳ ቦንቹሳ፤ ዋዛናማ ጊዲኮ ሂንቲሳ።

14 ኢሶይ ኡባሰ ሃይቄዳይሳኔ ኡባይ ቃሲ ኢያራ ሃይቄዳይሳ ኑ ኤሪያ ጊሾ ኪሪሰቶሳ ሲቆይ ኑና ሃራሰ።

15 ዴጋን ዴዔይሳቲ ሂዛፔ ጉዬ ባንታው ጊደናሺን ኤንታው ሃይቄዳይሳኔ ሃይቆፔ ዴንዲዳይሳሰ ዶና ማላ ኪሪሰቶሲ አሳ ኡባ ጊሾ ሃይቁሰ።

16 ሂዛፔ ጉዬ፡ ኑኒ ኦናካ አሳ ቆፋን ፐርዶኮ። ሃይሳፌ ካሴ ኑኒ ኪሪሰቶሳካ አሳ ቆፋን ፐርዲዳባ ጊዲኮካ፡ ሂዛፔ ሃሳዳ ፐርዶኮ።

17 ሄሳ ጊሾ፡ ኦኒካ ኪሪሰቶሳን ዴዒኮ ኦራሳ ማዴቴሌ፤ ጋልዓ ማዴቴላይ ኦዴሰ፤ ኡባይካ ኦራሌ ጊዲሰ።

18 ሄሳ ኡባ ያሳይ ኦሌሰ። ኢ ኪሪሰቶሳ ባጋራ ኑና ባራ ሲጌሌሰ። ቃሲ ሃራታ ባራ ሲጌላና ማላ ኑሰ ሲጌል ኦሶ ኢሚሰ።

19 ያሳይ ኪሪሰቶሳ ባጋራ አሳ ኡባ ባራ ሲጌሌሰ። ኤንታ ናጋራ ታይቢቤና፤ ቃሲ አሳ ባራ ሲጌሌያ ቃላ ኑሰ ኢሚሰ።

20 ያሳይ አሳ ኑ ባጋራ ያጊያ ጊሾ ኑ ኪሪሰቶሳን ኪቲቲዲ አሳ ያሳራ ሲጌቲቲ ጊዲ ኪሪሰቶሳ ጊሾ ዋሶሰ።

21 ኑኒ ያሳ ዲሎቴላ ኪሪሰቶሳ ባጋራ ኤካና ማላ፡ ናጋራ ኤርና ኪሪሰቶሳ ኑ ጊሾ ናጋራንቹ አሳዳ ኦሌሰ።*

6

1 ኑኒ ያሳራ ኢሲፌ ኦሌያ አሲ ጊዴይሳዳ፡ ሂንቲ ኤኪዳ ኦዴ ኬሃቴላ ሃዳ ኦሶና ማላ ኑ ሂንቲና ዋሶሰ።

2 ያሳይ፡

«ታ ኔና ሲዓና ዋዴን ሲዓሰ፤

አቶቴላ ጋላሳን ኔና ማዳሰ»

ያጌሰ። ሄኮ፡ ታ ሲዒያ ዋዴይ ሃዒ፤ አቶቴላ ጋላሳይ ሃቹ።

3 ኦኒካ ኑ ኦሱዋ ቦራና ማላኔ ኑናን ዱቤታና ማላ ኮዮኮ።

* 5:21 ናጋራንቹ አሳዳ፡ ናጋራ ያርሾ ኦሌሰ። 6:2 አሳ 49:8

4 ገደሺን፣ ኑ ቱማ ያሳ አሳንቸታ ገደይሳ ኑ ኦሊያ ኡባባን ቤሲዳ። ዳሮ ገንጫን፣ ዋዬን፣ ሜቶን፣ ኡንዓን፣

5 ጋራፊቴላን፣ ቃሾን፣ ኢያን ኩሚዳ ዎጫማን፣ ዳቡራን፣ ጳሰኮ ጳዮን፣ ያማን፣

6 ጌሻቴላን፣ ኤራቴላን፣ ዳንዳዓን፣ ከሃቴላን፣ ጌሻ አያናን፣ ቱማ ሲቆን፣

7 ቱማ ሃሳያኒኔ ያሳ ዎልቃን ኑኒ ኢያ አሳንቸታ ገደይሳ ቤሲዳ። ቃሲ ዲሎቴላይ ኑስ ቶራኔ ጎንዳሌ።

8 ኑኒ ቦንቸተዳኔ ቶሼተዳ፤ ጫዬተዳኔ ጋላቴተዳ። ቱማ ሃሳዮስ፣ ሺን አሳይ ኑና ዎርዳንቸ ገደሶና።

9 ኑ አሳን ኤሬተዳ አሲ፣ ሺን ኤሬቶና አሳ ሜላ ገደዳ። ሃይቂደሶና ያንቴዳ፣ ሺን ፓፃ ዴዖስ፤ ሾጩተዳ፣ ሺን ሃይቂቦኮ።

10 ኑኒ አዛኒኮካ ኡባ ዎዴ ኡፋይቶስ። ኑ ማንቆ ዳናስ፣ ሺን ዳሮ አሳ ዱሬዮስ። ቃሲ አይኮይካ ባይና አሲ ዳናስ፣ ሺን ኡባይ ኑባ።

11 ቆሮንቶሳ አሳው፣ ኑ ሂንቴው ቆንጨኑን ኑዲዳ፤ ኑ ኡሉዎ ሂንቴና ቤሲዳ።

12 ሂንቴ ኑና ሂንቴ ሲቁዎ ቤሶና ዲጊዴታፔ አቴን ኑ ኑ ሲቁዎ ሂንቴና ዲጊቦኮ።

13 አጧ ባ ናይታስ ኦዴይሳዳ ታ ሂንቴው ኦዴይስ፤ ኑ ሂንቴና ኑ ኡሉዎ ቤሲዳይሳዳ፣ ሂንቴካ ሂንቴ ኡሉዎ ኑና ቤሲቴ።

አማኖና አሳራ ዴዒያ ኢሲፊቴላ አጎ

14 አማኖና አሳራ ቤሶና ኦጌን ዎዴቶፊቴ። ዲሎቴላሲኔ ናጋራስ አይቢ ጋሂቴላ ዴዒ? ፖዖሲኔ ቆማስ አይቢ ኢሲፊቴላ ዴዒ?

15 ከሪስቶሳኔ ፃላሂ ኢሲፊ ጋሊያባይ አይቤ? ቃሲ አማኔይሲኔ አማኖናይሲ ኢሲፊ ኮዲያባይ አይቤ?

16 ያሳ ከላስ ኤቃታራ አይቢ ኢሲፊቴላ ዴዒ? ያሳይ፡

«ታኒ ኤንታ ገደን ዴዒና፡

ኤንታ ገደን ሃሙታና።

ታኒ ኤንታ ያሳ ገደና፤

ኤንቲካ ታ አሴ ገደና»

ገደይሳዳ፣ ኑኒ ዴዖ ያሳ ከሌ።

17 ሄሳዳካ፣ ጎዳይ፡

«ኤንታ ገደፊ ሻኬተዲ ከዪቴ፤

ቱና ገደዳባ ቦቸፊቴ፤

ታ ሂንቴና ኤካና።
 18 ታ ሂንቴው አዋ ጊዳና፤
 ሂንቴ ታው አዴ ናይታኔ ማጫ ናይታ ጊዳና፤
 ያጌሰ ኡባፌ ዋልቃማ ጎዳይ» ያጌሰ።

7

1 ሂዛ፡ ታ ሲቆቶ፡ ሃ ኡፋይሳይ ኑስ ዴዒያ ጊሾ ኑ አሹዋኔ ኑ ሹምፑዋ ቱኒሲያባ ኡባፌ ኑና ጌሾሰ። ያሳሰ ያዩዲ ኑ ጌሻቴላ ፖሎ ኦሉሰ።

ጳውሎሳ ኡፋይሳ

2 ሂንቴ ኡሉዋ ኑና ቤሲቴ። ኑኒ ኦናካ ናቂቦኮ፤ ኦናካ ቆሂቦኮ፤ ኦናካ ጨሚቦኮ።

3 ታኒ ሂሳ ሂንቴ ቦላ ፐርዳናው ጊኬ። ሃይሳፌ ካሴ ታ ሂንቴው ኦዲዳይሳዳ፡ ሂንቴ ኑ ዋዛናን ዴዔታ፤ ኑ ፓፃ ዴዒንካ ሃይቂንካ ሂንቴፌ ሻኬቶኮ።

4 ታ ኦዲያባ ሂንቴፌ ቆቲኬ፤ ታ ሂንቴናን ጨቁታይሰ፤ ኑ ዋዬ ኡባን ማኔታይሰ፤ ቃሲ ጊታ ኡፋይሲ ኡፋይታይሰ።

5 ኑኒ ማቂዲያ ቢዳ ዋዴ ኡባ ባጋራ ዋዬቲዳፔ አቲን ሹምፐቦኮ። ካሬራ ሞርኬታን፡ ኑ ጋላን ያሻን ኡንዔቲዳ።

6 ሺን አዛኒዳይሳታ ሚንሌሌያ ያሳይ፡ ቲቶ ዩሳን ኑና ሚንሌሌሰ።

7 ኑና ሚንሌሌዳይ ቲቶ ዩሳ ፃላላ ጊደናሺን ሂንቴካ ኢያ ሚንሌሌዳይሳና። ሂንቴ ታና ላሞቴይሳ፡ ታው አዛኔይሳኔ ታው ቆፔይሳ ታ ሲዒዳ ዋዴ ታና ዳር ኡፋይሲሰ።

8 ታ ዳብዳቤይ ሂንቴና አዛንሊኮካ አይሰ ፃፋዲናሻ ጋዳ ቂርቲኬ። ታ ቂርቲዳይ ታ ፃፊዳ ዳብዳቤይ ሂንቴና ጉላ ዋዴሰ አዛንሊዳ ጊሾሳ።

9 ሃዒ ታኒ ኡፋይቲዳይ፡ ታ ሂንቴና አዛንሊዳ ጊሾ ጊደናሺን ሂንቴ አዛኖይ ሂንቴና ሂንቴ ናጋራፔ ዛሪዳ ጊሾሳ። ያሳይ ባ ሹኒያዳ ሂንቴና አዛንሊሲፔ አቲን ኑ ሂንቴና አይቢንካ ቆሂቦኮ።

10 ያሳይ ኮያ አዛኖይ፡ አቶቴላኮ ጋሊያ ናጋራፔ ሲሞ ኤሄሰ፤ ኢያን ቂርያባይ ባዋ። ሺን ሃ ሳዓ አዛኖይ ሃይቆ ኤሄሰ።

11 ሂንቴ አዛኖይ ሂንቴናን አይፊሲዳ አይፊያ ቤዒቴ። ሂ አዛኖይ ሂንቴና አይ ሜላ ዴንሌሊዳኮ፡ አይ ሜላ ዛር ኢማናዳ

6:17 እሳ 52:11 6:18 2ሳሙ 7:14፤ 1ታሪ 17:13፤ እሳ 43:6፤ ኤር 31:9
 7:5 2ታሪ 2:13

ገቢሲዳኮ፡ ሄ ኡራ ቦላ አይ ማላ ሃንቁሲዳኮ፡ አይ ማላ ታው ያያና ማላ ኦሊዳኮ፡ አይ ማላ አሞዪዳኮ፡ ሄ ኡራ ሴራናው አይ ማላ ገቢዳኮ ቤዒቴ። ሃ ኡባባን ሂንቴ ጌሺ ገዴይሳ ማርካዪዳታ።

12 ሄሳ ገሾ፡ ታኒ ሃ ዳብዳቢያ ሂንቴው ፃፊዳይ፡ ናቂዳ ኡራ ዋይኮ ናቂቴዳ ኡራ ገሾ ገዴና። ሺን ሂንቴ ኑስ አይ ማላ ቆፒያኮ ያሳ ሲንላን ሂንቴ፡ ሂንቴና ቤዒና ማላ ዓፋስ።

13 ኑኒ ኡፋይቴዳይ ሄሳ ገሾሳ። ኑ ኡፋይሳፌ አጲዲ ኑና ዳሮ ኡፋይሲዳይ፡ ሂንቴ ቴቶ ኡፋይሲዳይሳኔ ኢያ ዋዛና ሸምፒሲዳይሳ።

14 ታኒ ሂንቴና ናሻዳ ኢያው ኑዳን ሂንቴ ታና ዬላዪቤኬታ። ሸን ኑኒ ኡባ ዋዴ ሂንቴው ቴማ ኑዲዳ፤ ሃሳዳካ ኑኒ ቴቶ ሲንላን ሂንቴና ናሻዳይሲ ቴማ ገዲስ።

15 ሂንቴ ኢያው ያሻን ኮኮሪዳ፡ ኢያ ሞኪዳይሳ ቃሲ ኢያው አይ ማላ ከቴቴዳኮ ኢ ቆፒያ ዋዴ ሂንቴው ዴዒያ ሲቆይ ማኒሾ ቢስ።

16 ታኒ ኡባባን ሂንቴናን አማኔቴያ ገሾ ኡፋይታይስ።

8

አሞባ

1 ኑ አሻቶ፡ ያሳይ ማቁደኒያን ዴዒያ ዋሳ ኬላታስ አሚዳ አጼ ኬሃቴላ ሂንቴ ኤራና ማላ ኑ ኮኖስ።

2 ኤንቲ ገታ ሜቶን ፓጩቴዶሶና፡ ሺን ኤንታ ኡፋይሳይ ዋልቃማ። ኤንታ ማንቆቴላስ ዛቂ ባዋ፡ ሺን ባንታ አሙዋን ዳሮ ኬሂዶሶና።

3 ኤንቲ ባንታ ዋልቃ ማላኔ ባንታ ዋልቃፌ አጼይሳ ዶሲዲ አሚዳይሳስ ታ ማርካ።

4 ኤንቲ ያሳ አሳ ማዲያ ሎዖ ኦሶ ኑራ ኦላናው ኮዪዲ ኑና ዳሮ ዋሲዶሶና።

5 ኤንቲ ኑኒ ቆፒዳይሳፌ አሊዲ ኦሊዶሶና። ኮይሮቴዲ ባንታና ጎዳስ አሚዶሶና፤ ካሊዲ፡ ያሳ ሸኒያዳ ባንታና ኑስ አሚዶሶና።

6 ሃ ሎዖ ኦሶዋ ዶሚዳ ቴቶይ ጉጂ ኦላናዳኔ ሂንቴና ማዲዲ፡ ሄ ኦሶዋ ፖሊሳናዳ ኢያ ዋሲዳ።

7 ሺን ሂንቴ ኡባባን፡ አማኖን፡ ሃሳያን፡ ኤራቴላን፡ ገታ አሞን፡ ኑና ሲቆኒኔ ኡባባን ዱሬቴዳይሳዳ ሃ ሎዖ ኦሶዋንካ ሂንቴ ኬሃ ገዴና ማላ ኑ ኮኖስ።

8 ታኒ ሄሳ ኪታናው ጊኬ። ሺን ሃራታ ገታ አሙዋ ሂንቴ ሲቁዋራ ጋሳ በዓዳ ሂንቴ አይ ኬና ቱሜኮ ኤራናው ጋይሰ።

9 ሂንቴ ኑ ጎዳ ዩሱስ ኪሪሰቶሳ አጾ ኬሃቴሳ ኤሬታ። ኪሪሰቶሲ ዱሬ ጊዲ ኡቲዲ፣ ሂንቴ ኢያ ማንቆቴላን ዱሬታናዳ ሂንቴ ገሾ ማንቂሰ።

10 ታኒ ሃ ኦዳን ሂንቴና ማዲያ ዞሬ ዞራናው ኮያይሰ። ሂንቴ ዚላይሴ አማናው ፃላላ ጊደናሺን ሄሳ ኦላናው አሞቴላንካ ሂንቴ ኮይሮ።

11 ሂንቴ ኦላናው ደሚዳ አሱዋ ሃዒ ፖሊቴ። ሂንቴ ሂንቴው ዴዔይሳ ኬና አሚኮ፣ ሄሲ ሂንቴ አማናው ዳሮ አሞቴይሳ ቆንጨሴሰ።

12 ኢሲ አሲ አማናው አሞቲኮ፣ ኢያ አሞይ ያሳ ሲንላን ኤኬቴይ፣ ኢ ባው ዴዒዳይሳ ኬና አሚናፔ ኣቲን ባይናባፔ አማናው አንዴቲን ጊዳና።

13 ታኒ ሄሳ ጌይ፣ ሂንቴ ኡባይ ኢሲ ገና ጊዳና ማላሳፌ ኣቲን ሃራቲ ዋያፔ ሺምፒን ሂንቴ ዋይታና ማላሳ ጊዳና።

14 ዋዴ ኤንታ ፓላሃይ ሂንቴ ፓጫ ኩንላና ማላ ሃዒ ሂንቴ ፓላሃይ ኤንታ ፓጫ ኩንላ። ሄሳን ሂንቴ ገና ጊዳና።

15 ጌሻ ማፃፃን፣ «ዳሮ ሺሺዳይሳሰ ፓላሂቤና፤ ጉላ ሺሺዳይሳሰ ፓጨቤና» ጌቲቲ ፃፊቲዳይሳ ማላ።

ቲቶኔ ኢያ ላጌታ

16 ኑ ሂንቴው ቆፔይሳዳ ቲቶይካ ሂንቴው ቆፓና ማላ አሊዳ ያሳይ ጋላቴቶ።

17 ቲቶይ ሂንቴኮ ቢዳይ፣ ኑ ኢያ ዴንጼሊዳ ገሾ ፃላላ ጊደናሺን ኢ ባ ሺኔን ባናው አሞቲዳ ገሾሳ።

18 ዋንጌላ ማርካቴላን ዋሳ ኬላ ኡባን ዳሮ ኤሬቲዳ አሻ፣ ኑኒ ቲቶራ ኢሲፌ ኪቶሰ።

19 ሄሳ ቦላ ኑኒ ሃ ኬሃ አሞታ ኤፊያ ዋዴ ኑራ ባና ማላ ሃ ሎጾ አሱዋን ጎዳ ቦንቻናዉኔ ሃራታ ማዳናው ዴዒያ አሙዋ ቤሳናው ኢ ዋሳ ኬላታን ደሬቲሰ።

20 ሃ አሜቲዳ ኬሃ አሙዋ፣ ኑ ኦሶ ቦላ ፔሺያ ዋዴ ቦሬቶና ማላ ናጌቶሰ።

21 ኑኒ ጎዳ ሲንላን ፃላላ ጊደናሺን ኣሳ ሲንላንካ ሎጾ ጊዲዳባ አላሰ።

22 ቃሲ ዳሮ ዋዴ ፓጩን ሚኒዲ ኣጳዳ ኑ ኢሻ፣ ኤንታራ ሂንቲኮ ከቲዳ። ኢ ሂንቴናን ኬሂ ኣማኔቲያ ገሾ ሃዒ ሂንቴና ማዳናው ዳሮ ኣሞቴሰ።

23 ቲቶባ ኤራናው ኮይኮ፣ ኢ ሂንቴና ማዳናው ታራ ኦሲያ ታ ኦሶ ላጊያ። ሃንኮ ኢሻታባ ጊዲኮ ዋሳ ኬላቲ ከቲዳይሳታ፤ ቃሲ ኣሳይ ኤንታ ዲሳ ቤዒዲ ከሪሰቶሳ ቦንቾሶና።

24 ሄሳ ገሾ፣ ዋሳ ኬላቲ ሂንቴ ሲቁዋኔ ኑ ሂንቴና ናሼይሲ ቱማ ጊዳይሳ ቆንጪሳናው ሂንቴ ሲቁዋ ሃ ኣሳታ ቤሲቴ።

9

ኣማኒያ ኣሳሰ ኬሲዳ ሚሺያ

1 ኣማኒያ ኣሳሰ ኬሲያ ሚሺያባ ታ ሂንቴው ፃፋናው ኮሼና።

2 ሂንቴ ማዳናው ኬሂ ኣሞቴይሳ ታ ኤራይሰ። ሂንቴ ኣካያ ኣሳይ፣ ዚላይላፌ ዶሚዲ ማዳናው ገጌቲዳይሳ ታኒ ማቁደኒያ ኣሳሰ ዶና ኩንላዳ ኦደሰ። ሂንቴ ገታ ኣሞይካ ኤንታፌ ዳርታ ዴንሌሊሰ።

3 ሃ ኦሱዋን ሂንቴናን ኑ ጩቁቲያ ጩቆይ ሃዳ ገደና ማላ ኮይሮ ሂንቴባ ታ ኦዲዳይሳዳ ሂንቴ ገጌቲዲ ናጋና ማላ ሃ ኢሻታ ሂንቴኮ ከታሰ።

4 ማቁደኒያ ኣሳይ ታራ ቢዲ፣ ሂንቴ ገጌቶና ዴዒሺን፣ ዴሚኮ፣ ኑ ሂንቴናን ዬላታና፤ ቃሲ ሂንቴ ኑፔ ኣጶ ዬላታና።

5 ሄሳ ገሾ፣ ሃ ኢሻቲ ታፔ ሲንላቲዲ ሂንቴኮ ቢዲ፣ ሂንቴ ኢማና ገዳ ኢሙዋ ካሴቲዲ ገገሳና ማላ ታ ኤንታና ከታሰ። ታኒ ጋኪያ ዋዴ ሄ ኢሞይ ገገ ኡቴሰ። ሄ ዋዴ ሄ ኬሃቴላ ኣሞይ ዋልቃን ገደናሺን ዶሳን ገዳይሳ ኤሪሰሰ።

6 ሃይሳ ኣኬኪቴ፤ ጉሉ ዜሪዳይ ጉሉ ጫካና፤ ዳሮ ዜሪዳይ ዳሮ ጫካና።

7 ያሳይ ኡፋይሳን ኢሚያ ኡራ ዶሲያ ገሾ ዋልቃን ዋይኮ ዶሲ ባይና ገደናሺን ኢሲ ኢሲ ኣሲ ባ ዋዛናን ቆፒዳይሳዳ ዶሳን ኢማናው ቤሴሰ።

8 ኡባ ዋዴ ኡባባን ኮሺያባ ኡባ ዴሚዲ ሎያ ኦሶ ኡባ ኦላናው ዳንዳባና ማላ ያሳይ ሂንቴው ባ ኣንጂዋ ዳርሳና።

9 ገሻ ማፃፋን፣
«ኢ ባ ሻሉዋ ማንቆታሰ ላሊሰ፤
ኢያ ዲሎቴላይ ሜሪናው ዴባና»
ያጌሰ።

10 ዜሬይሳስ ዜሬሌ፣ ማናው ካሌ አሚያ ጎዳይ፣ ሂንቴ ዜሬያ ዜሬላ ዳርሲዲ አማና። ሂንቴ ፀሎቴላ ኣይፊያካ ዳርሳና።

11 ዳሮ ኣሳይ ሂንቴ አሚያ ኢሙዋ ኑፔ ኤኪዲ፣ ያሳ ጋላታናዳ፣ ሂንቴ ኡባ ዎዴ ዳርሲዲ አሚይሳታ ጊዳና ማላ ያሳይ ሂንቴና ኡባ ባጋራ ዲሬያና።

12 ሃ ሂንቴ አሚያ አሞይ አማኒያ ኣሳ ፓጫ ኩንሎ ፃላላ ጊዳናሺን ኣሳይ ያሳ ጋላታናው ጋሶ ጊዳሰ።

13 ሃ ሂንቴ ኦሶይ ሂንቴ አማኑዋ ኤርሲዲ ኪሪሰቶሳ ዎንጌላ ሂንቴ አማኒዲኔ ኢያው ከቴቴዲ ሂንቴው ዴዲያባ ኤንታራኔ ሃራታራ ቫኩቴዳ ጊሾ ኡባይ ያሳ ቦንቻና።

14 ያሳይ ሂንቴው አሚዳ ኣጶ ኬሃቴላ ጊሾ ኤንቴ ሂንቴው ያሳ ዎሲሼ ሂንቴና ቤዓናው ላሞቶሶና።

15 ዛዋ ባይና ያሳ ኢሙዋስ ያሳይ ጋላቴቶ።

10

ጳውሎሲ ሞቴይሳታስ ዛሪዳ ዛሩዋ

1 ታ ሂንቴራ ዴዲያ ዎዴ ሹጎ፣ ቃሲ ሂንቴፌ ሃኪያ ዎዴ ኑ ቦላ ሚኔስ ያጌቴዳ፣ ጳውሎሲ፣ ኬሃኔ ኣሽኬ ጊዲዳ ኪሪሰቶሳ ሱንላን ሂንቴና ዎሳይሰ።

2 ታኒ ሂንቴኮ ቢያ ዎዴ ኑ ኣሾ ቆፋራ ሲሜሬቴያ ኣሲ ኦሌዲ ቆፒያ ኣሳ ቦላ ሚኖ ቃላን ኦዴታናው ቆፋ ቃቻሰ። ሂንቴ ቦላ ሄሳዳ ኦዴታና ማላ ሂንቴ ታና ኦሶናዳ ሂንቴና ዎሳይሰ።

3 ኑኒ ሃ ሳዓን ዴዲኮካ ሃ ሳዓ ኣሳዳ ኦሌቶኮ።

4 ኑ ኦላ ሚሼይ ሃ ሳዓይሳ ጊዳና። ሺን ሚፃ ላላናው ዎልቃራ ዴዲያ ያሳ ቶራ። ቱማራ ኤቄቴያ ፓላማኔ።

5 ያሳ ኤሮና ማላ ዲጊያ ኦቶሮ ቆፋ ኡባ ላሎሰ። ኣሳ ቆፋ ኡባ ዲዲዲ ኪሪሰቶሳስ ከቴታና ማላ ኦሶሰ።

6 ሂንቴ ከቴቴላይ ፖሎ ጊዲያ ዎዴ ኑኒ ከቴቴላ ኢያ ኡባ ሴራናው ጊጌታና።

7 ሂንቴ ኣይፌይ ቤዲዳ ማላ ፒርዴታ። ኦኒካ ባና ኪሪሰቶሳባ ጊዲ ቆፒያባ ጊዲኮ፣ ኑካ ኪሪሰቶሳባ ጊዳይሳ ኤሮ።

8 ጎዳይ ታው አሚዳ ማታን ጩቄቴኮካ ሄሳን ዩላቴኬ። ሄ ማታይ ታው አሚቴዳይ ሂንቴና ዲቻናሳፌ ኣቴን ቆሃናሳ ጊዳና።

9 ታኒ ታ ዲብዳቢያን ሂንቴና ያሺሳናው ኮያዳ ፃፊዳባ ዳሮፖ።

10 ኢሲ ኢሲ አሳይ፡ «ጳውሎሳ ዳብዳቤይ ደያኔ ዋልቃማ፡ ሺን ኢያ ሶምዖን ቤዒያ ዋዴ ኢ ዳቡራንቸ፤ ኢያ ኦዳይካ ፓሌና» ያጎሶና።

11 ሄ አሳቲ ኑ ሃሆን ደዒሼ ፃፊያ ዳብዳቤያኒኔ ማታን ሂንቴራ ደዒሼ ኦሊያ ኦሱዋ ጊደን ደማቴሊ ባይናይሳ አኬኮ።

12 ኑኒ ባንታና ናሺያ አሳታራ ኑና ጊናያናው ዋይኮ ጋዴያናው ኮዮኮ። ሺን ኤንቲ ባንታና ባንታራ ጊናዬዲ ዋይኮ ጋዴዬዲ ቤዒሼ ኤያ።

13 ሺን ኑኒ ያሳይ ኑስ ኢሚዳ ቆሳን ጨቆቶሲፔ አቲን ዛዋ ፒኒዲ ጨቆቶኮ፤ ሄ ዛዋይ ሂንቴኮካ ጋኬሰ።

14 ኑኒ ቤሴይሳፊ አሊዲ ጨቆቶኮ፡ ሺን ኪሪሰቶሳ ዋንጌላ ሂንቴኮ ጋሊዲይሳን ጨቆቶሰ።

15 ኑኒ ያሳይ ኤሲዳ ዛዋፔ ፒኒዲ፡ ሃራቲ ኦሊዳ ኦሶን ጨቆቶኮ። ጊደሺን፡ ሂንቴ አማኖይ ዲጫና ማላ ያሳይ ኢሚዳ ዛዋን ሂንቴ ጊደን ኑ ኦሊያ ኦሶይ ዳልጋና ጊዲ ቆፖሰ።

16 ኑኒ ሃራ አሲ ባ ዛዋን ኦሊዳ ኦሶን ጌሊዲ ጨቆቶኮ፡ ሺን ሂንቴፊ ፒኒዲ ሃራታሰ ዋንጌላ ማርካታናው ዳንዳዖሰ።

17 ሺን፡ ጌሻ ማፃፋን፡ «ጨቂያ ኡባይ ጎዳ ሎጎቴላን ጨቆ» ያጊዲ ፃፊቲሰ።

18 ጎዳይ ናሺያ ኡራፔ አቲን ባና ባው ናሺያ ኡራይ ናሺቴና።

11

ጳውሎሳኔ ዋርዳንቸ ሃዋሬታ

1 ታ ጉላ ኤያቴላ ሂንቴ ሃዒካ ዳንዳናና ጋዳ ቆፓይሰ፤ ሃያና ዳንዳዒቲ።

2 ያሳይ ሂንቴው ቆፒዳይሰሳዳ፡ ታካ ሂንቴው ቆፓይሰ። ታኒ ሂንቴና ጌሻ ጌላዒዳ ኢሲ አዲያ፡ ኪሪሰቶሳሰ ኢማናው ኦይቻ ዋላሰ።

3 ሺን ሸሻይ ባ ጌኒያን ሄዋኖ ባሌሊዲይሳዳ ኑኒ ኤሪ ሂንቴ ዋዛናይ አቲዲ ኪሪሰቶሳሰ ደዒያ ሂንቴ ሱራቴላኔ ጌሻቴላ አጋንዴቲ ጋዳ ሂርጋይሰ።

4 ኢሲ አሲ ዬዲ፡ ኑኒ ሂንቴው ማርካቲዳ ዬሱሳፔ ሃራ ዬሱሳ ሂንቴው ማርካቲኮ፡ ዋይኮ ሂንቴ ኤኪዳ አያናፔኔ ዋንጌላፔ ሃራ አያናፔ ዋንጌላ ሂንቴው ኦዲኮ፡ ሲዒ ጊዲ ኤኬታ።

5 ሺን ታኒ ዬሱሰ ኪቲዳ «ጌታ ሃዋሬታፔ» ጉዖይሰ ጋዳ ቆፒኬ።

10:17 ኤር 9:24 11:3 ሜዴ 3:1-5

6 ታኒ ኦዲ ኤርና ኣሲ ጊዲኮካ፣ ኤራቴሊ ታው ዴዔስ። ሄሳ ታ ሂንቴው ዳር ኦጌን ቆንጪሳሰ።

7 ታኒ ሚሼ ኦይቸና ያሳ ዋንጌላ ሂንቴው ጮ ኦዲዳይሲኔ ሂንቴና ቶቁ ኦላዳ ታና ቶቸዳይሲ ታው ናጋራ ጊዲ?

8 ታኒ ሂንቴው ኦላናው ሃራ ዋሳ ኬላታፔ ሚሼ ቦንቃ ኤካሰ።

9 ታ ሂንቴራ ዴዔያ ዋዴ ታና ሚተንካ ሂንቴፊ ኢሲ ኣሲካ ዋይሳቢኬ። ማቄደኒያፔ ዪዳ ኣማኔይሳቲ ታና ኮሺያባ ኡባን ማዲደሶና። ሃቸ ጋካናው ታ ሂንቴው ቶሆ ጊዳቢኬ ሲንሳሰካ ቶሆ ጊዲኬ።

10 ኪሪሰቶሳ ቱማቴላይ ታናን ዴዒሺን፣ ታ ጩቁዋ ኣካያ ቢታን ታና ኦኒካ ዲጌና።

11 ታ ሃይሳ ኣይሰ ጋይና? ሂንቴና ደሶና ጊሾሴዬ? ታኒ ሂንቴና ደሴይሳ ያሳይ ኤሬሰ።

12 «ኦካ ሂንቴ ማላ ኦላሰ» ያጊዲ ጩቁያ ሃንኮ ሃዋሬታ ጩቁዋ ጋሱዋ ቆይሳናው ሃዒ ታ ኦላይሳ ሲንሳሰካ ኣላና።

13 ሃይሳ ማላ ኣሳቲ ኪሪሰቶሳ ሃዋሬ ዳናናው ባንታና ለማያ ዋርዳንቸ ሃዋሬታኔ ጪሚያ ኦሳንቸታ።

14 ሄሲ ማላሊሲያባ ጊዴና፣ ኣይሰ ጊኮ፣ ፃላሄይ ፖዎ ኪታንቸ ዳናናው ባና ለማሰ።

15 ሄሳ ጊሾ፣ ፃላሄ ኦሳንቸቲ ዓሎቴላ ኦሳንቸታ ዳናናው ባንታና ለማኮ ሄሲ ጊታባ ጊዴና። ኤንቲ ዉርሴላን ባንታ ኦሱዋዳ ኤካና።

ጳዉሎሳ ጋኪዳ ማቱዋ

16 ኦኒካ ታና ኤያ ጊዲ ቆፖና ማላ ዛራዳካ ኦዲይሰ። ታ ሂንቴው ኤያ ዳኒኮካ ታ ጉላራ ጩቁታና ማላ ታና ኤያ ኦላዲ ኤኪቴ።

17 ታኒ ሃይሳዳ ጩቁታዳ ኦዴቴይ፣ ጎዳይ ኮዬይሳዳ ጊደናሺን ኤያቴላን ኦዲይሰ።

18 ዳር ኣሳይ ሃ ሳዓባን ጩቁቲያ ጊሾ ታካ ጩቁታና።

19 ሂንቴ ዋዛናማ ጊዲያ ጊሾ ኤያ ኣሳባ ኡፋይሳን ዳንዳዔታ።

20 ኦኒካ ሂንቴና ኣይሌይኮ ዋይኮ ሂንቴና ቦንቁኮ ዋይኮ ባው ማዴታናው ሂንቴኮ ሺቁኮ ዋይኮ ሂንቴ ቦላ ኦቶርቲኮ ዋይኮ ሂንቴና ባቁኮ ሂንቴ ዳንዳዔታ።

21 ኦኒ ሄሳ ኣላናው ዳር ዳቡራንቸ ጊዴይሳ ዬላታሺ ታ ኦዲይሰ።

11:9 ፊል 4:15-18

ሺን እነካ ሚኒዲ ጩቂቲኮ፥ ታካ ጩቂታናው ሚናይሰ። ታኒ ሄሳ ኤያ አሳዳ ኦዴታይሰ።

22 ኤንቲ ኢብራዌ? ታካ ኢብራዌ። ኤንቲ ኢስራዔል? ታካ ኢስራዔል። ኤንቲ ኣብራሃሜ ሼሼ? ታካ ኣብራሃሜ ሼሼ።

23 ኤንቲ ኪሪሰቶሳ ኦሳናቾ? ታኒ ጎሻ አሳዳ ኦዴይሰ፥ ኤንታፊ ኣዲያ ኪሪሰቶሳ ኦሳናቾ። ታኒ ኦሶን ዳሮ ዳቡራስ፤ ዳሮ ዋዴ ቃሼታስ፤ ጋራፊታስ፤ ዳሮ ዋዴ ሃይቆፔ አታስ።

24 ኣይሁዴቲ ታና ሃስታማኔ ኡዲፋና ኢቻሹ ቶሆ ጋራፊዶሶና።

25 ሄቹ ቶሆ ፃሞዓን ሾጩታስ፤ ኢሲ ቶሆ ሹቻን ጫዳታስ፤ ማርካቤይ ሄቹ ቶሆ ማዒስ፤ አባ ጊዶን ኢሲ ቃማ ኩሜላ አቃዳ ፔዓስ።

26 ታኒ ዳሮ ኦጊያ ዳቡራን ሃሙታስ። ኪፃ ሃላፊኔ ፓንጋፊ አታስ። ኣይሁዴቲኔ ኣይሁዴ ጊዶና አሳይ ታ ቦላ ሜቶ ጋሊዶሶና። ካታማይ፥ ባዞይ፥ አባይ፥ ታና ያሼስ፤ አማኒያ ዳኒያ አሳቲ ታና ዋይሲዶሶና።

27 ታኒ ኦሶን ዳቡራሲኔ ጫዋታስ፥ ዳሮ ቶሆ ዲስኮ ዲያስ፥ ኮሻታስ፥ ሳሞታስ፥ ዳሮ ቶሆ ያማስ፥ ማጌታስ፥ ካሎታስ።

28 ሃራባ ኡባ ታይቦና ኡባ ዋዴ ታና ቆፊሴይ ዋሳ ኬላታባ።

29 ኢሲ አሲ ዳቡሪያ ዋዴ ኢያራ ታ ዳቡራቢኪና? ኢሲ አሲ ናጋራን ቆቤቲያ ዋዴ ታ አዉዴ ቂሮቶና አጋዲና?

30 ታ ጩቂታናው ኮሺያባ ጊዲኮ ታኒ ዳቡራንቾ ጊዴይሳ ኤሪሲያባን ጩቂታና።

31 ማሪናው ቦንቼቲዳ ያሳይ፥ ኦ ጎዳ ዬሱስ ኪሪሰቶሳ አዋይ፥ ታ ዋርዶቶናይሳ ኤሬስ።

32 ዳማስቆ ካታማን አሬታሳ ጊያ ካዉዋፔ ጋርሳራ ሃሬይሲ ታና ኣይላናው ኮዪዲ ዳማስቆ ካታማ ፔንጊያ ናጊሲስ።

33 ሺን አሳይ ታና ዳቾን ዬጊዲ፥ ካታማ ዲርሳ ማስኮቲያራ ዋዲሲን ታኒ ኢያ ኮሺያፔ አታስ።

12

ጳውሎሳ ቆንጩላ

1 ጩቂቲላስ ጎሲ ባይናይሳ ኤራይስ። ሺን ጩቂታናው ኮሺኮ፥ ጎዳፔ ኤኪዳ ቆንጩላን ጩቃና።

11:23 ሃ.ኦ 16:23 11:24 ዛሬ 25:3 11:25 ሃ.ኦ 16:22፤ 14:19
11:26 ሃ.ኦ 9:23፤ 14:15 11:32 ሃ.ኦ 9:23-25

2 ታማኔ ኦይዲ ላይላፌ ካሴ፥ ኪሪሰቶሳ ኣማኒያ ኢሲ ኡሪይ ሄቫንሶ ሳሉዋ ቢዳይሳ ታ ኤራይሰ። ሄ ኡሪይ ኣሾን ዋይኮ ኣሾፔ ካራራ ቢዳኮ ታ ኤሪኬ፤ ያሳይ ኤሪሰ።

3 ሄ ኡሪይ ሄቫንሶ ሳሉዋ ኤኬቲዳይሳ ኤራይሰ። ሺን ኢ ኣሾን ዋይኮ ኣሾፔ ካራራ ኤኬቲዳኮ ታ ኤሪኬ፤ ያሳይ ኤሪሰ።

4 ሄ ኡሪይ ጋናቴ ኤኬቲዲ ኣሲ ቆንጨሳናውኔ ኣሲ ኦዳናው ዳንዳዖናባ ሲዒሰ።

5 ታኒ ሄ ኣዲያባን ጨቁታና፥ ሺን ታኒ ታ ዳቡራፔ ኣቲን ታናን ጨቁቲያባይ ባዋ።

6 ታኒ ቱማ ኦይቲያ ጊሾ ጨቁታናው ኮይኮካ ኤያ ጊዲኬ። ሺን ኣሲ ታ ኦሌይሳ ቤዔይሳፌኔ ሲዔይሳፌ ኣሊዲ ቆፖና ሜላ ጋዳ ጨቁቲሉ ኣጋይሰ።

7 ታው ቆንጨዳ ገታ ቆንጨላን ታ ኦቶርቶና ሜላ ታና ዋይሳናው ታ ኣሾዋን ጫዲያ ፃላሂያ ኪታንቸይ ታው ኢሜቲሰ።

8 ሃ ዋይሲያባ ታፔ ዲጋና ሜላ ታኒ ጎዳ ሄቭ ቶሆ ዋሳሰ።

9 ሺን ጎዳይ፥ «ታ ዋልቃይ ኔ ዳቡራን ቆንጨያ ጊሾ ታ ኣቋ ከሃቴላይ ኔው ጊዳና» ያገሰ። ኪሪሰቶሳ ዋልቃይ ታናን ቆንጨና ሜላ ታ ዳቡራን ኡፋይታሽ ጨቁታይሰ።

10 ታኒ ኪሪሰቶሳ ጊሾ ዳቡሪያ ዋዴ ጫዬቲያ ዋዴ ዋዬቲያ ዋዴ ጎዴቲያ ዋዴ ሜቶቲያ ዋዴ ታ ዳቡራን ኡፋይታይሰ። ኣይሰ ጊኮ፥ ታ ዳቡሪያ ዋዴ ሄ ዋዴ ሚናይሰ።

ጳውሎሲ ቆርንቶሳ ኣሳሰ ቆፔሰ

11 ታኒ ኤያ ኣሳዳ ጨቁታሰ። ሄሳዳ ታ ጨቁታና ሜላ ኦሊዳይ ሂንቴና። ታ፥ ታ ሁዔን ኤሬቶና ኣሲ ጊዲኮካ፥ «ጊታ ሃዋሬታ» ጌቴቲይሳታፔ ጉዳኬ። ሄሳ ታው ማርካታናው ቤሴይ ሂንቴናሺን።

12 ታ ሂንቴ ጊዳን ዳዓሼ ዳንዳዓን ኦሊዳ ማላታቲኔ ማላቲ ታ ቱማ ሃዋሬ ጊዳይሳ ቤሶሶና።

13 ታ ሂንቴው ቶሆ ጊዳናይሳፌ ኣቲን ሃራ ዋሳ ኬላታፔ ሂንቴ ኣይቢን ጉዳዴቲ? ሄሲ ባላ ጊዲኮ ታና ማዕቲ።

14 ታኒ ሂንቴኮ ባናው ጊኬቲሺን ሃይሲ ታው ሄቫንሶ። ታ ሂንቴናፔ ኣቲን ሂንቴው ዳዒያባ ኮዮና ጊሾ ሂንቴና ዋይሳናው ኮዩኬ። ዩሊዳይሳቲ ባንታ ናይታሰ ሻሎ ሚንጀሶናፔ ኣቲን ናይቲ ባንታና ዩሊዳይሳታሰ ሻሎ ሚንጀኮና።

15 ታ ሂንቴ ጊሾ ታው ዳዒያባኔ ታና ኣሳ ኢሚንካ ታና ኡፋይሴሰ። ያቲን፥ ታኒ ሂንቴና ሄሳዳ ከሃ ሲቂያ ዋዴ ሂንቴ ታና ጉሳራ ሲቂቲ?

16 ጊዲኮካ፣ ታ ሂንቲው ቶሆ ጊዲኬ፤ ዋይሳቢኬ፤ ሺን ሂንቴና ጨሞኒኔ ጌኔን ኦይኪዳባ ሂንቲው ዳኖና ኣጌና።

17 ሃሪ ኣቶሺን፣ ታ ሂንቴኮ ከቲዳ ኣሳታፔ ሂንቴና ጨሚዳ ኣሲ ዴዒ?

18 ቲቶይ ሂንቴኮ ባና ሜላ ታኒ ዋሳስ፤ ቃሲ ኣመነያ ኣሻካ ኢያራ ዬዳሰ። ያቲን፣ ቲቶይ ሂንቴና ጨሚዳ? ኮኒ ኑ ኦሱዋ ኢሲ ኣያናን ኦሲቦኮ? ቃሲ ኑ ሃኖይካ ኢሲኖ ጊዴኔ?

19 ኑ ኡባ ዋዴ ሂንቴ ሲንፋን ኑና ዲሊሳናው ሞቲቲያባ ሂንቲው ዳኒ? ኑ ከሪሰቶሳን ዴዒዲ ያሳ ሲንፋን ሃዒ ጋካናው ኦዶስ። ኑ ሲቆ ኣሻቶ፣ ኑ ሃ ኡባ ኦሌይ ሂንቴና ዲቻናሳ።

20 ታ ሂንቴኮ ቢያ ዋዴ ኣኒ ኤሪ ሂንቴ ታ ኮዬይሳዳ ሃኖና፣ ቃሲ ታካ ሂንቴ ኮዬይሳዳ ሃኖና ጋሄቶና ኣጎኮ ጋዳ ያያይሰ። ቃሲ ኣኒ ኤሪ ሂንቴ ጊደን ፓላሚ፣ ቃናቲይ፣ ሃንቆይ፣ ዪቁይ፣ ዘጊርሲ፣ ኣሳ ሱንፋ- ኢሶይ፣ ኦቶሮይኔ ካቺ ዶና ኣጌና ጋዳ ያያይሰ።

21 ታኒ ናምዓንፋ ሂንቴኮ ቢያ ዋዴ ያሳይ ሂንቴ ሲንፋን ታና ካወሻና ጋዳ ያያይሰ። ካሴ ናጋራ ኦሲዲ ሄ ባንታ ኦሲዳ ቱናቲፋፊ፣ ላይማቴፋፊኔ ዬላያ ኦሱዋፔ ሲሚቦና ኣሳታ ቤዓዳ ኣዛኖና ኣጊኬ ጋዳ ያያይሰ።

13

ወርሴፋ ዞሬኔ ሳርፋ

1 ታ ሂንቴኮ ቢሺን ሃይሲ ሄዳን። ኣይ ሞቶይካ ናምዑ ዋይኮ ሄዳ ማርካን ሚኔስ።

2 ታኒ ናምዓንፋ ሂንቴራ ጋሄቲዳ ዋዴ ሂንቴ ጊደን ካሴ ናጋራ ኦሲዳ ኡራኔ ሃራታ ኡባ ሴርና ኣጊኬ ጋዳ ኦዳ ዋሳስ። ሃዒ ታ ሃካዳ ዴዒኮካ ሲማዳ ሂንቴኮ ቢያ ዋዴ ኦዴሰካ ቃዴቲኬ።

3 ታናን ዴዒዲ ኦዴይ ከሪሰቶሳ ጊዴይሳ ሂንቴ ኤራናው ኮዬታ። ኢ ሂንቴራ ሃሳያ ዋዴ ዋልቃማፔ ኣቲን ሂንቴ ጊደን ዳቡራንቾ ጊዴና።

4 ከሪሰቶሲ ማሰቃሊያ ቦላ ዳቡራን ካቁቲስ፣ ሺን ያሳ ዋልቃን ዴዳን ዴዒስ። ኢ ዳቡራንቾ ጊዲዳይሳዳ፣ ኑካ ዳቡራንቾ። ሺን ሂንቴና ሃጋዛናው ያሳ ዋልቃን ኢያራ ዴዳን ዳና።

5 ኣማኖን ሚኒዲ ዴዒያኮ ሂንቴና ሂንቴው ፓጩ ቤዒቲ። ፓጩን ሂንቴ ኩንዶና ኣቲኮ፣ ከሪሰቶሲ ሂንቴናን ዴዒይሳ ሂንቴ ኤሬታ። ሺን ከሪሰቶሲ ሂንቴናን ዶና ኢዲኮ ሂንቴ ኩንዴታ።

6 ኮኒ ፓጩን ኩንዶናይሳ ሂንቴ ኤሬታ ጋዳ ኣማናይሰ።

7 ሂንቴ ኢታባ ኦሶና ማላ ኮኒ ያሳ ዋሶስ። ኮኒ ማኖ ጊዳይሳ አሳይ ቤዓና ማላ ጊዳናሺን ኮኒ ማኖ ጊዳና ኢደኮካ፣ ሂንቴ ሎዎ ኦሶና ማላ ኮኒ ዋሶስ።

8 ኮኒ ቱማሰ ኦሶሲፕ አቲን ቱማራ ኤቄቲያባ አይባካ ኦሶኮ።

9 ኮ ደቡሪያ ዋዴ ሂንቴ ቃሲ ማኒያ ዋዴ ኮና ኡፋይሴሰ። ሂንቴ ቦሬይ ባይናይሳታ ጊዳና ማላ ኮ ሂንቴው ያሳ ዋሶስ።

10 ታኒ ሂንቴፊ ሃካዳ ዴዓሽ ፃፊዳይ ሄሳ ጊሾሳ። ታኒ ሂንቴኮ ቢያ ዋዴ ጎዳይ ታው ኡሚዳ ማታን ዜሞፓዳ ሂንቴ ቦላ ጎዳታናው ኮዩኬ። ጎዳይ ታው ማታ ኡሚዳይ፣ ሂንቴና ማዳናሳፊ አቲን ቆሃናሳ ጊዳና።

11 ዉርሴላን ታ አሻቶ፣ ሳር ዴዒቴ። ቦሬይ ባይና ዴዒቴ፤ ታ ዘሪያ ሰዒቴ። ኢሲ ዋዛናን ጊዲዲ ዴዒቴ፤ ሳርቴላን ዴዒቴ። ሲቆኔ ሳር ኡሚያ ያሳይ ሂንቴራ ጊዳ።

12 ጌሻ ዩሬቴላ ዩሬቴሽ፣ ኢሶይ ኢሱዋ ሳርላቴ።

13 ያሳ አሳ ኡባይ ሂንቴና ሳር ሳር ያጎሶና።

14 ጎዳ ዩሱሰ ኪሪሰቶሳ አጾ ኬሃቴላይ፣ ያሳ ሲቆይ፣ ጌሻ አያና ኢሲፊቴላይ ሂንቴ ኡባራ ጊዳ።

ኦራሳ ጩቂዋ ጎፋላ
New Testament in Gofa

copyright © 2011 Wycliffe Bible Translators, Inc.

Language: Gofa

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Gofa

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 18 Apr 2025 from source
files dated 29 Jan 2022

c35d6c73-3843-5482-b53e-7559d35deee5